

I SIOPS

Co' si ere canae, il prin dal an, si tacave di biele buinore a cori dai nonos, dai sântui, dai barbis e dâur il bon prinzipi. E cun chê muse rote e chel istint di scroc che si à di fruz, si slungjave la man par cjapâ i siops.

Dopo cressûz, un pôc parvie de creanze e de dignitât, un pôc parcè che lis usanzis plui bielis a' son muartis te prime uere, si à imparât a dâ il bon an nome a cui che si cjate (...par cuminazion!) pes stradis o in plazze; e i siops, nissun si vise altri di lôr.

"Patrie dal Friûl", sfazzade come al solit, no va a bazzilâ daûr de creanze e, a so mût, 'e torne al antîc: 'e torne a cirî i siops. Sântui e barbis de Furlanie a' son chei siôrs ch'ò vin mandâz a Rome cun tune gambiâl firmade in blanc a fâ la part di rapresentanze de nestre int.

Par grazie di cheste gambiâl, diputâz e senadôrs ai àn un titul, une buine pae, un grum di privilegjos. Sore ce? Ce ano savût fà pe lôr base eletorâl, pe lôr tiare, par solevâ la miserie e la mancjanze di lavôr de lôr int? Interpelanzis, mozions, ordins de zornade, propuestis e promessis. Pal lôr partît, zamp o diestri o mezan, ai àn fat di dut: a' son stâz spielis di ubidienze e discipline. Ma tra i furlans che ju àn mandâz a Rome, ind'esal tros che àn te sachete une tessare di partît e tal cûr un grant amôr e une vere fêde tai partîz?

E alore, siôrs, 'o sin ca parvie dai siops. Bon an in salût ai nestrîs partevôs, ai nestrîs sântui o barbis: ma i siops fûr che vegnin! Alc al è stât dât, dal bon cûr de puare int, ai uàrfins di duc' i istitûz, ai pitocs di duc' i paîs, ai cence cjase di ogni provenienze: cumò 'e sares ore di viodi a vignî alc ancje pal Friûl. Di ruf o di raf i sbrègos di altris regjons a' son stâz imblecâz o che si è daûr a imblecâju ancje cui nestrîs carantans si capîs! I nestrîs sbregos chei di Rome no ju viodin, parvie de lontananze e parvie che noaltris, cassù, no si tegnsi in bon di metiju in mostre.

Ma i nestrîs parlamentârs a' san cetanc' ch'and'e e dulà che a' son. Ur tocje a lôr di cjatâ fûr fîl e gusiele e di repezâju almancul un fregul.

Che si tegnin te sachete lis interpelanzis e lis mozions che no scjàldin la coradele a nissun, e che si fàsin sintî cun altris argumenz: magari alzant la vôs e pestant i pîs, une volte che a Rome no si capîs altri lengaz.

Al è dibant ciscâ sotvosvie cui sôrz!

Parcè che se lôr no àn flât o no an cjâf o no an fiât par fâsi sintî, bisugnarà pursì che al tachi a sberlâ cualchidun altri...